



SEBAHAGIAN 10,000 orang memenuhi perkarangan pentas utama menyaksikan Konsert Senandung Buatmu Gaza di USIM, Nilai, Negeri Sembilan, semalam. - UTUSAN/ AINAA MARDHIAH MOHD. GHAZALI

# 10,000 orang meriahkan Konsert Senandung Buatmu Gaza

**SEREMBAN 17 Nov.** - Hampir 10,000 orang memenuhi perkarangan pentas utama Konvensyen Keusahawanan Islam Ke-10 (iCEPS10) di Universiti Sains Islam Malaysia (USIM), Nilai dekat sini bagi memeriahkan Konsert Senandung Buatmu Gaza, semalam.

Konsert anjuran iCEPS10 bersama-sama Aman Palestin dan Nasyeed.com itu merupakan kemuncak Pesta Konvo Ke-12 USIM yang bertujuan menyampaikan dakwah melalui hiburan, sekali gus melahirkan nilai-nilai murni rohani dan jasmani.

Sepanjang konsert itu berlangsung, Tabung Gaza diedarkan bagi mengutip sumbangan untuk penduduk Palestin.



Selain itu, antara artis yang turut memeriahkan konsert itu ialah Ramli Sarip, Mestica, Maulana AF8, Muadz Dzulkefly dan One Soulz.

Menurut Ramli, beliau tidak menyangka konsert kali ini lebih hebat berbanding persembaannya di Istana Budaya.

"Ternyata para mahasiswa di sini mempunyai jiwa dan perasaan

halus serta sangat menjiwai bait lagu yang didendangkan," katanya.

Menurut pengarah konsert tersebut, Mohamad Hafizuddin Abd. Manap, program seperti itu dapat melahirkan kesedaran dalam diri yang kadangkala alpa tentang isu yang menimpa saudara Islam di Gaza.

Sebelum konsert berakhir, program diteruskan dengan penyampaian Tabung Gaza kepada wakil Aman Palestin yang disempurnakan Naib Canselor USIM, Prof. Datuk Dr. Musa Ahmad.

Yang turut hadir, Timbalan Naib Canselor (Hal Ehwal Pelajar dan Alumni), Prof. Datuk Dr. Mohamed Asin Dollah dan Pengarah Urusan iCEPS10, Dr. Nuradli Ridzwan Shah.